

## **Mesi Napano Pol Bivitauiiao Ban VAILIMON Verialiano Moti**

*Tukunuano bulati na niosi nei*

Vailimon naio be namoneano tai, napano tomu miroano ajidom naio be toro tai na yimo lu na rove Kolosi, a naio be tubo na naimāuano tai na siano Onesimas. Onesimas buro nua den kiano tubo Vailimon, ba jo yako Romo, bururvenuo na Pol joa nalakoiano eaio na naio biviuo Pol, a bogo na naio binimei be namoneano. Pol jiri mēsi tai ba ban Vailimon, bika naio ka monoka rivuru Onesimas rivan bere to vija naio bereio. Pol ber ban Vailimon, ber voniganei Onesimas binimei be namoneano ruei, mia bo ka naio tinien ser re naio, mia viekokoa naio a rivuru bere naio ka ve kiano naimāuano kurano bereio. A mia naio ve re ga naimāuano kurano, rimei ve kuruano riano tai bior napano naljuo amiasol ea Yesu Kristo.

*Torogio nalo na niosi nei*

Iliano moti 1-3

Pol miaia Vailimon bior kiano imāuano 4-7

Pol bika kirisikili ban Vailimon ka rivuru bereio Onesimas 8-22

Iliano maariano 23-25

*Pol jikar kiano iliano ban Vailimon*

<sup>1</sup> Kiniou Pol, nojomā nejirii mēsi nei biedu banso, Vailimon. Vonganei kiniou nojoa komeli labo na vio Romo, mia bior nojomā nemila imāuano napano Yesu Kristo kiano, tenene na

nalo amila kiniou nojoa yimo na tetavokoiano ea vio nei. Kuruado nei Timoti naio jo bija kiniou ea vio nei, naruei kumemi juo nuber kavijo bo p̃eli na bogiano bo banso, napano kito tolu romiãau ea ga Tubo takurano ga,

<sup>2</sup> a kumemi juo kenememi iliano nei jibe nei naio rivan bunu kuviviniedo na, Niavia, a van bunu toro na kiado bagaro na, Akipas, napano naio be toro kouo na mira na Tubo kiano iãauano, bija bagaro na namoneano dolu nalo napano ajumãa abior ea kunuamo.

<sup>3</sup> Naruei kumemi juo nubolkouo ka mia Atua Karamãado, a kiado Tubo Yesu Kristo, nalo ve juo adu kialo tiniememiano a tumãaroano to vija kamiu ea vio napano kumituaio.

### *Vailimon kiano tinietiano a viekouoiano toru laka*

<sup>4</sup> Kuruaku Vailimon, bogo napano nojomãa nejidomialso ea kanaku ilivol-kouano nalo, bogo nonovio nojomãa nober siva damãariga ban Atua biorso.

<sup>5</sup> Nina bior nomijog ruei ka napano ajumãa aberii kanamo bajago novo, napano kanamo viekouoiano ea Tubo Yesu naio jikili vatitigio bo, a kanamo tinietiano ban namoneano nalo bunu, naio toru laka.

<sup>6</sup> Ana nojomãa nobolkouo kaso ka bogo napano kojomãa kobiovio bulag kiamo viekouoiano ban kulo dolu nalo, mia rila nalo ajikia ve telabo lie vo ilivuiano novo nalo napano romijeivio, napano romidu Kristo ea kiado meuliano.

<sup>7</sup> Nao, Vailimon, kanamo tinietiiiano novo na naio joŃa mila namoneano lu nalo, kialo iviso amijog bo-o mia, mia bogo napano nomijog vite nei mila kiniou nomijog bo bereio, a mila najaaro toru kanio.

*Pol balea Vailimon ka naio rivuru bereio kiano toro na iŃauano nei Onesimas*

<sup>8</sup> Nao Vailimon, kiniou nejidom novika titai denso. Ea buruŃara iŃauano na Kristo kiano napano nojoŃa nemilaio, ƣeli memedu ga ka mia kiniou never batitig ga ka jau ka mia jau kala tibe na tibe na,

<sup>9</sup> mia takii bajago na tinietiiiano, maka nesidom neil sikili tibe na vanso. Vonganei nebinimej nebe tormoruo ruei, nojoa yimo na tetavokoiano bior Yesu Kristo, naruei nejidom nevika denso ga, verenio jau kajaaro ka kajamo ka vite napano ver nevika denso.

<sup>10</sup> Mia toro tai joa vio na, ka bogo napano nojoa yimo na tetavokoiano jibe na naruei ana nobur toro nene binimej ea Kristo, mia vonganej nojo nemial naio jibe ka keneriku tai. Toro nene, Onesimas ga, napano beamu naio be toro napano joŃa miŃau kanamo, karina naio buro binimej ea vio nei.

<sup>11</sup> Nao, toro nene, siano nioti nene be “Rila iŃauano na bo,” mia nemial jibe ka nanua beamu, naio maka toŃa riŃau batitig kanamo rivu laka. Mia vonganej, napano kiano meuliano mijulio ruei, mia kiniou nomonmonea naio ka mia naio mijikia rila iŃauano novo nalo ka mia

riijaso, a naio mijikia rila iñauano ka mia rijai kiniou bunu.

<sup>12</sup> Mo, vonganei nejidom neiila bereio Onesimas riviedu rialso bereio naruei, jibe ka nomidular kiaku meuliano togio ga nemiila biedu banso.

<sup>13</sup> Najaaro ver naio toa vio nei vija kiniou ga, ka rijai kiniou ea bogokouo nei, napano kiniou nojoa yimo na tetavokoiano bior Ioluano Vou, mia ver naio rila tibe na, javukia napano naio midu jelemo, naio mila iñauano tai napano memedu ka mia jau kala van kiniou.

<sup>14</sup> Mia maka rivu ka mia nesikili kanio ka mia naio to vija kiniou tibe na, bior jau maka kejikia. Nejidom ka vere jau kala iñauano novo tai tibe na van kiniou, mia nina maka bior notutuaso kanio, mia bior kanamo jidomiano novo a kanamo tinievuiano ga. Venia napano mia Onesimas naio rilaio, ve kanamo ga ka mia jau koverialio.

<sup>15</sup> Riano ga ka napano Onesimas naio buro denso, ana mia kei rijikia, ñeli Atua ga mila naio jaluvo denso ka bogo na bulati tai jibe na, ka vere naio riviedu easo bereio, mia naio ve kiamo bo kanio naruei, rivano-o mia to toboto.

<sup>16</sup> Nina bior vonganei, mia naio riviedu easo bereio maka bunu tibe ka toro na kiamo iñauano ga, mia naio riviedu bereio tibe kanio kuruamo tai ea Yesu, napano jibe na naruei naio bo laka. Tinieku jii naio toru ruei, jibe ka kuruaku tai, ana nomonmonea ka mia jau tiniemo tii naio riva lie riva lie vo laka, bior naio be kanamo toro ruei, ana mave kanio, vonganei naio binimei be kuruamo bunu.

17 Vite na naruei nojomãa nobika denso. Ver jau komial nejibe ka kuruamo, a ka robe juo robe tomu na romila imãuano takurano ga, nejidom ka mia kovuru bereio Onesimas riviedu easo, rive verare ga ka napano ver neviedu easo, mia jau kasaaro ve toru laka ka mia kovuru kiniou neviedu ea kunuamo.

18 Mia vero Onesimas bina ka kiamo titai, ðeli na naio mila bulag kiamo vite tai, ðeli na vaio, mia kiniou ga nevitii vite nalo nene.

19 Iliano nei kiniou Pol nei nojomãa nejirioo ka jumãaku ga, javukia kana-ku verikariano tai banso, ka ver kosidomii, mia kiniou novulu bulag nonovio kiano jabue denso. Mia ðeli jau kotomãa kosidomii ve dolu kia ga ka jau bunu be kiamo jabue tai napano toru joa kiniou, napano be kanamo meuliano vodolu, bior kiniou nemilaso kobokar meuliano nei ea bogo napano nomioliolu ka Ioluano Vou banso.

20 Tibe na, ana mia nejidom ka jau kala imãuano novo na rivan kiniou napano nojomãa nebika denso ea Tubo siano. Kuruaku liki, ver kala tibe na, mia nojog rivu ve toru laka bereio ea kiaku iviso, napano Kristo kiano meuliano novo naio jomãa mimãau ea kiado meuliano nalo jibe na.

21 Maka nemerou ka netiri iliano nalo nei vanso tibe na, bior nemijikia batitig ruei ka napano mia kala takii napano nebika denso. Nao, nemijikia bunu ka ðeli mia kala rivu lie bunu, rivano-o mia tovulu kanaku vitiiano.

22 A nejidom nevika vite dolu tai denso bunu, ka neber bo kaso ka kala batitig kiaku vajoomo

tai ea kunuamo, bior kiniou nebe kiaku jidomiano kouo tai ka vesiou re, mia Atua naio rijamo ka nevedu ea kamiu bereio, javukia napano kumituña kubika denio ea kenemiu volkouano nalo.

*Pol kiano iliano maaro ban Vailimon*

<sup>23</sup> Epavras nei, napano naio bunu kumemi juo numitua yimo na tetavokoiano ea vio nei bior Yesu Kristo, naio berenio Atua riilivu ka jau.

<sup>24</sup> Ana nalo dolu na, Mak a Arestakas a Timas a Luka, napano nalo ajuña amijai kiniou toru ea iñauano, nalo bunu aber ajuña tinielo maio kaso ea kanalo volkouano nalo.

<sup>25</sup> Mia vonganei, kanaku volkouano jibe nei, ber tiniememiano napano Tubo Yesu Kristo kanano, naio toa kenemiu iviso nalo nonovio.

Kiniou, Pol.

---

**1:23** Kolo 1:7, 4:12    **1:24** Iñauo 12:12,25, 13:13, 15:37-39; Kolo 4:10, Iñauo 19:29, 27:2; Kolo 4:10, Kolo 4:14; 2Timo 4:10, Kolo 4:14; 2Timo 4:11

**Verikariano Vou Na Baki**  
**The New Testament in the Baki language of Epi,**  
**Vanuatu**  
**Le Nouveau Testament en Baki langue de l'île d'Épi**  
**au Vanuatu — Niutestamen long Baki lanwis, blong**  
**Epi Aelan, Vanuatu**

copyright © 2016 Wycliffe Bible Translators, Inc.

Language: Baki

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 18 Apr 2025 from source files dated 31 Aug 2023

f1528695-aae7-544e-aadd-9084a3830ae4